

楚

辭

新

集

註

自序

余幼好楚辭多不解稍長讀諸家所註愈不解然往往一吟其可解者則回風雨雪身置湘沅夫吾家自漢遷關中至今已忘乎爲楚人矣甲戌春由梁晉燕趙登泰山觀滄海謁夫子廟庭得觀車服禮器竊歎世吾斯世而道斯吾道也既遊吳越訪古金陵俯仰延佇而不能去遙望荆郢鬱蔥之氣湧耀夕陽亂流間若咫尺可到此非吾二千年之故國耶將揚帆破浪問江界之遺風與所謂兩東門者不果而美人芳

草益渺渺興懷乃集楚辭新註始戊午正月三月而
畢畧諸所共解者而詳予向所愈不解者欲令吾黨
同解焉然恐終未當於三閤意中之言言外之意亦
僅斯章句而已嗚呼四十五年之奔走蓋亦出於跋
涉艱辛窮愁迫阨之餘者也書成姑記歲月云

蒲城屈復題于燕山客舍

屈原列傳

史記

屈原者名平楚之同姓也爲楚懷王左徒博聞彊志明於治亂嫻於辭令入則與王圖議國事以出號令出則接遇賓客應對諸侯王甚任之上官大夫與之同列爭寵而心害其能懷王使屈原造爲憲令屈平屬草藁未定上官大夫見而欲奪之屈平不與因讒之曰王使屈平爲令衆莫不知每一令出平伐其功曰以爲非我莫能爲也王怒而疏屈平屈平疾王聽之不聰也讒諂之蔽明也邪曲之害公也方正之不

容也故憂愁幽思而作離騷離騷者猶離憂也夫天
者人之始也父母者人之本也人窮則反本故勞苦
倦極未嘗不呼天也疾痛惻怛未嘗不呼父母也屈
平正道直行竭智盡忠以事其君讒人間之可謂窮
矣信而見疑忠而被謗能無怨乎屈平之作離騷蓋
自怨生也國風好色而不淫小雅怨誹而不亂若離
騷者可謂兼之矣上稱帝嚳下道齊桓中述湯武以
刺世事明道德之廣崇治亂之條貫靡不畢見其文
約其辭微其志潔其行廉其稱文小而其指極大舉

類通而見義遠其志潔故其稱物芳其行廉故死而
不容自踈濯淖污泥之中蟬蛻於濁穢以浮遊塵埃
之外不獲世之滋垢皜然泥而不滓者也推此志也
雖與日月爭光可也屈原既絀其後秦欲伐齊齊與
楚從親惠王患之乃令張儀詳去秦作周厚幣委質事楚
曰秦甚憎齊齊與楚從親楚誠能絕齊秦願獻商於
之地六百里楚懷王貪而信張儀遂絕齊使使如秦
受地張儀詐之曰儀與王約六里不聞六百里楚使
怒去歸告懷王懷王怒大興師伐秦秦發兵擊之大

破楚師於丹浙斬首八萬虜楚將屈匄遂取楚之漢
中地懷王乃悉發國中兵以深入擊秦戰於藍田魏
聞之襲楚至鄧楚兵懼自秦歸而齊竟怒不救楚楚
大困明年秦割漢中地與楚以和楚王曰不願得地
願得張儀而甘心焉張儀聞乃曰以一儀而當漢中
地臣請往如楚如楚又因厚幣用事者臣靳尚而設
詭辯於懷王之寵姬鄭袖懷王竟聽鄭袖復釋去張
儀是時屈平既疏不復在位使於齊顧反諫懷王曰
何不殺張儀懷王悔追張儀不及其後諸侯共擊秦

天破之殺其將唐昧時秦昭王與楚婚欲與懷王會
懷王欲行屈平曰秦虎狼之國不可信不如無行懷
王稚子子蘭勸王行奈何絕秦歡懷王卒行入武關
秦伏兵絕其後因留懷王以求割地懷王怒不聽亡
走趙趙不內復之秦竟死於秦而歸葬長子頃襄王
立以其弟子蘭爲令尹楚人既咎子蘭以勸懷王入
秦而不反也屈平既嫉之雖放流睠顧楚國繫心懷
王不忘欲反冀幸君之一悟俗之一改也其存君興
國而欲反覆之一篇之中三致意焉然終無可奈何

故不可以反卒以此見懷王之終不悟也人君無智
遇賢不肖莫不欲求忠以自爲舉賢以自佐然亡國
破家相隨屬而聖君治國累世而不見者其所謂忠
者不忠而所謂賢者不賢也懷王以不知忠臣之分
故內惑於鄭袖外欺於張儀疏屈平而信上官大夫
令尹子蘭兵挫地削亡其六郡身客死於秦爲天下
笑此不知人之禍也易曰井渫不食爲我心惻可以
汲王明並受其福王之不明豈足福哉令尹子蘭聞
之大怒卒使上官大夫短屈原於頃襄王頃襄王怒

而遷之乃作懷沙之賦其辭云云於是懷石遂自投汨羅以死屈原既死之後楚有宋玉唐勒景差之徒者皆好辭而以賦見稱然皆祖屈原之從容辭令終莫敢直諫其後楚日以削數十年竟爲秦所滅自屈原沉汨羅後百有餘年漢有賈生爲長沙王太傅過湘水投書以弔屈原

太史公曰余讀離騷天問招魂哀郢悲其志適長沙觀屈原所自沉淵未嘗不垂涕想見其爲人及見賈生弔之又怪屈原以彼其材遊諸侯何國不容而自

令若是讀服鳥賦同死生輕去就又爽然自失矣

楚辭目錄

卷一

離騷經

卷二之三

九歌

天問

卷四之五

九章

遠遊

卷六

卜居

漁父

九辨

卷七之八

招魂

大招

附楚懷襄二王在位事蹟考

懷王

威王太子名熊槐在位三十年

癸巳元年魏聞楚喪伐楚取陘山

張儀初相秦四年秦惠王始稱王

戊戌六年楚使昭陽攻魏破之襄陵取八邑

所謂南辱於楚者此

癸卯十一年楚為從約長與趙魏韓燕伐秦攻函谷關

秦出兵逆之五國皆引兵歸

時屈子為左徒王甚任之國內無事惜往

日篇所謂奉先功以照下別法度之嫌疑國富強而法立是也屈子有功在此其招諂妬亦在此

戊申十六年

齊湣王

秦使張儀約楚絕齊許以商於之

地六百里楚絕齊秦不予地遂攻秦

見本傳。洪興祖謂屈子

被疏在此年。○按史記被疏尚在前，疏者止是不與議國事耳，未嘗奪其左徒之位也。絕齊時疑必諫，離騷云：「反信讒而齎怒，惜誦篇云：「反離羣。」而賁眈當俱指此，則奪其位者在此年耳。

巳酉

十七年春，秦敗楚於丹陽，斬首八萬，虜大將屈匄。

裨將逢侯丑等七十餘人，取漢中郡。楚悉起國中

兵，襲秦，大敗於藍田，割兩城以和。韓、魏聞楚困襲

楚，至鄧，楚引兵歸。

見本傳。○屈子雖廢猶在朝，忽

余以蕙纁又申之以攬茝，申者言既廢又切責之也。則合前兩次見拒可知。惜誦當作於此年。

庚戌

十八年，秦約分漢中之半與楚，和親。懷王願得張

儀，不願得地。儀至，厚幣靳尚，說鄭袖，使之王，釋

之見本傳。○屈子使齊而反，諫已不及。愚按：使齊必以見欺於秦為謝，再修前好，獨使屈子者，以絕齊時羣臣皆賀得地，陳軫獨弔而軫又往仕秦，別無可使，故不以既絀而不用，則前此之諫絕齊益可知矣。屈子未反，舉朝又無一人諫。王釋張儀之非，則其黨於靳尚，亦可知。所以謂之黨人。

壬子 二十年齊湣王欲為從約，長遺書與楚楚，以昭睢

議欲雪藍田之耻，遂合齊以善韓。前使屈子之齊必為定從，從雪耻。

計茲湣王書至而又未決者，以魯為從約長耻見奪耳。昭睢之議甚確，豈離騷所謂蘭板其人乎。

丙辰 二十四年秦昭王初立，厚賂楚楚，往迎婦，遂背齊

而合秦。狗利棄信，所以速禍。况秦為虎狼之國，非可以婚姻結乎。屈子以彭咸死諫為法，必

越諫而被遠遷，絕其言路，惜往日篇所謂讒人蔽晦，虛惑誤又以欺遠遷臣而弗思是也。虛惑當指

絕齊言誤當指攻秦言又以欺當指背齊合秦言

己巳 二十五年懷王與昭王盟約於黃棘在房襄二境上秦復

與楚上庸

楚情蠶姻而往然武關之辱實此盟誤之悲同風篇刺頃襄迎婦於秦所謂施

黃棘之在策是也屈子雖遠遷尚欲南行而死諫終不得諫思美人篇當作於此時

戊午 二十六年齊韓魏責楚負其從親同伐楚楚使太

子橫入質於秦而請救秦兵至三國引去

諸侯連兵伐楚

本是意中之事但請救於秦而又質子則前此之迎婦結盟何為乎屈子必思一善後之策而陳詞懷王惟以秦救為美好而憐之朝臣又以王之造怒不敢正其是非所以不聽拙思篇當作於此年

己未 二十七年秦大夫有與楚太子關太子殺之亡歸

按敵國質子大夫豈敢與私間常是秦昭
正知懷王之惡實陰遣之使釀成兵端耳

庚申

二十八年秦與齊韓魏共攻楚殺楚將唐昧取重

丘而去

見本傳按懷王此時當思屈子之言而
召回但未復其位此事本與屈子無涉太

史公特敘入傳者作後來諫會武闕來歷
耳洪興祖以為十八年召用疑字之誤

辛酉

二十九年秦復攻楚大破楚軍死者二萬人殺將

軍景缺乃使太子為質於齊以求平

僅求齊不見
伐以支秦

壬戌

三十年

周赧王十六年
秦昭襄八年

秦復伐楚取八城遺書與

楚會武關結盟昭睢諫無往王稚子子蘭勸王行

秦詐令一將軍號為秦王伏兵武關俟懷王至閉

之遂與西至咸陽朝章臺如藩臣不與亢禮要其
割巫黔中郡懷王怒不許因留秦昭睢謀詐計於
齊齊歸太子遂立爲王秦不得所割怒攻楚大敗
楚軍斬首五萬取析十五城而去見本傳○屈子
先諫勿入武關
與昭睢所見相同無奈不聽按懷王爲人貪而且
愚又好矜蓋貪則可以利誘愚則可以計取好矜
蓋則喜諛而惡直齊秦兵好反覆屈子疏放皆坐
此三病武關受欺只悔不用昭睢之言而不及屈
子則好矜蓋積
怒猶未平可知

頃襄王

懷王太子名橫
在位三十六年

二年懷王亡逃歸被秦遮楚道從間道走趙不納

又欲走魏而秦兵追至遂同使者入秦發病見本傳

屈子又被謾放於江南之楚以取怨於令尹子蘭故也涉江篇當作於此年招魂亦當作於此年

甲子三年周赧王十九年懷王卒於秦秦歸其喪諸侯

自是不直秦秦楚絕大招當作於此時卜居當作於四年

丁卯六年秦遺書約決戰楚患之謀復與秦平以無可敵秦故

戊辰七年楚迎婦於秦忘不共之讐而結好總因國中無人不能為美政故為威勢所劫悲回風當作於此時哀郢當作於十年漁父

懷沙當作於十一年以汨羅自沈當在此年也

丁亥十四年與秦昭王會於宛結和親自此至末皆屈子身後事

丁丑十六年與秦昭王好會於鄢秋復與秦會穰

巴
十八年用楚人匹夫報讐之說遣使於諸侯復為

從秦伐楚楚欲與齊韓連和伐秦因欲圖周周使

說楚相昭子而止不能自強已失報讐之具况又圖共主乎誠譏諛虛惑之見也

庚辰
十九年秦伐楚楚軍敗割上庸漢北地予秦

辛巳
二十年秦將白起拔楚西陵

壬午
二十一年秦將白起拔郢燒先王墓夷陵楚兵散

不復戰東北保於陳城屈子哀郢篇云夏之為邱兩東門之燕不過十年而

即驗天問篇云吳光弔國久余是勝以吳光入郢掘平王墓而鞭屍也夷陵之燒何先見之明乃爾

癸未
二十二年秦復拔巫黔中郡前武關所要割不

予者又拔去矣

甲申

二十三年襄王收東地兵得十餘萬復取秦所拔

江旁十五邑以為郡距秦

已不成其為國天問篇告堵敖不長之說驗矣

戊子

二十七年復與秦平入太子為質於秦

按懷襄兩世屢結秦

好皆卒困於秦總以讒諛用事除迎婦質子之外別無伎倆天問所謂荆勲作師夫何長早已道破

丁酉

三十六年襄王病太子亡歸秋襄王卒

太子熊元立

屈子所著之文無先後次序考據茲將二君在位事蹟按年編輯參之史記本傳凡有明文者即繫於各年之下如無明文亦可以各篇語意推之以備讀者之參考即以爲屈子之年譜可也

凡例

一天下事創始難繼者差易離騷有註自王叔師始
後諸家論著即有詳細處要自王氏發之茲集先
王而後諸家大哉葦路藍縷之功也

一注騷者數十家予所見王叔師洪興祖朱晦翁林
西仲數家而已各執一是議論紛紜於中斟酌會
成條貫千金之裘非一狐之腋也仍錄姓名於首
不敢掠美

一篇章次序相傳已久或有錯誤後賢撥正附註題

下使高明得參是否若輒更定即是鹵莽滅裂則
吾豈敢今依王本存古也

一楚詞惟離騷經最難解句有同者意自各別並非
重複長篇大作原有條貫和氏之璧御璽材也搥
碎作零星小玉連城失色矣茲分五段庶得要領
一典故字釋多採諸家舊註李光弼將郭子儀之兵
纔經號令精彩一變非予所能間有補者不闕妙
意亦不另著至篇章意義斷自愚衷未敢依樣葫

蘆中

篇中神怪草木既知寓言何必深求或比才德或
比君子小人讀者自有會心臨文不贅

一離騷經難解在大義天問難解在故典四庫書目
諸史經籍志所載漢以後書不傳者甚多況漢以
前乎王叔師所引尚未盡見而三閭所用安能悉
知從何處撥正夫子曰吾猶及史之闕文也

一舊註是者固能發作者之精微其非者亦足開後
賢之思路雖不並錄亦不下論均有功於後先無
令前賢畏後生也

一文人相輕自古皆然痛詆他人以申已說若必後
賢以必吾是者著書各成一家天之生才不盡後
人自有心眼別裁是非豈在吾今日之嘵嘵哉況
我所論亦自前賢開悟操戈入室何其薄也往者
可欺來者難誣

一字面解釋如初度二言或云時節或云氣度或云
法度或云皆爲支首悉順文氣如此之類無損大
義俱不深辨

一六經子史皆有叶韻不徒楚辭也諸家議論紛紜

總是風影惟古今通韻

蕭山毛奇齡著

獨有根據今之所

音悉本此書即註字傍以便誦讀

戰國時典墳未灰三閭以博識宏才創爲斯體意味難窮余學識短淺諸家註解尚未全窺即盡畢生精力猶恐多失况七十餘年兩月成書粗疎何言修瑕補漏深有望於後之君子

屈原外傳

唐沈亞之撰

昔漢武愛騷令淮南作傳大概屈原已盡於此故大史公因之以入史記外有二三逸事見之雜記方志者尤詳屈原瘦細美髯丰神朗秀長九尺好奇服冠切雲之冠性潔一日三濯纓事懷襄間蒙讒負譏遂放而耕吟離騷倚耒號泣於天時楚大荒原墮淚處獨產白米如玉江陸志有玉米田即其地也嘗遊沅湘俗好祀必作樂歌以樂神辭甚俚原因棲玉筍山作九歌托以風諫至山鬼篇成四山忽啾啾若啼嘯

聲聞十里外草木莫不萎死又見楚先王廟及公卿
祠堂圖畫天地山川神靈琦瑋僂僂與古聖賢怪物
行事因書其壁呵而問之時天慘地愁白晝如夜者
三日晚益憤懣披蓁茹草混同鳥獸不交世務採柏
實和桂膏歌遠遊之章托遊仙以自適王逼逐之於
五月五日遂赴清冷之水其神遊於天河精靈時降
湘浦楚人思慕謂爲水仙每值原死日必以筒貯米
投水祭之至漢建武中長沙區同白日忽見一人自
稱三閭大夫謂曰聞君嘗見祭甚善但所遺并蛟龍

所竊今有惠可以棟樹葉塞上以五色絲縛縛之此
物蛟龍所憚回依其言世俗作糴並帶絲葉皆其遺
風晉咸安中有吳人顏珏者泊汨羅夜深月明聞有
人行吟曰曾不知夏之爲邱兮孰南東門之可蕪珏
異之前曰汝三閭大夫耶忽不見其所之江陵志又
載原故宅在姊歸鄉北有女嬃廟至今擣衣石尚存
時當秋風夜雨之際砧聲隱隱可聽也嘻異哉原以
忠死直古龍比者流何以沒後多不經事特千古騷
魂鬱而未散故騫熊雖久不祀三閭之迹猶時彷彿

占斷於江潭澤畔蒹葭白露中耳

楚辭卷一

宗姪

汝州

啟賢編

蒲城

屈復新集註

曾孫

來泰錄

受業

同邑

王垣校

離騷經第一

史記、離騷、猶離憂也、王逸曰、離別也、騷愁也、經
徑也、言已放逐離別、中心愁思、猶依道徑以諷
諫君也、班固曰、離猶遭也、騷憂也、明已遭憂作
辭也、應邵曰、離遭也、騷憂也、顏師古曰、離遭也、

援動曰騷。洪興祖曰：古人引離騷，未有言經者。蓋後世之士，祖述其辭，尊之爲經耳。逸說非是。朱熹曰：離騷經之所以名，王逸之說非是。史遷班固顏師古之說，得之矣。余觀楚辭中作遭離用者，固有而此篇有余，既不難。夫離別兮之句，則離騷者，離別之憂也。三閭之意，若謂明已遭憂而作此辭，則全部宜總名之曰離騷。今二十五篇各有題目，其義可知。近世稱楚辭皆曰離騷者，孔子曰：師摯之始，闕雎之亂，是以闕雎稱

全詩則稱楚辭爲離騷亦猶此而非二十五篇
皆名離騷也夫詩以比興賦能持人道之窮也
然無夫子刪定之存亡或未可知若離騷之存
而不亡自足存也詩可以興可以怨邇之事父
遠之事君多識於鳥獸草木之名離騷有焉尊
之曰經宜矣

帝高陽之苗裔兮朕皇考曰伯庸攝提貞于孟陬兮
惟庚寅吾以降皇覽揆余于初度兮肇錫余以嘉名
名余曰正則兮字余曰靈均

高陽顓頊有天下之號顓頊之後有熊繹者事周
成王封爲楚子居於丹陽傳國至熊通始僭稱王
徙都於郢是爲武王生子瑕食采於屈因以爲氏
此受姓之始捨近封而述遠祖蓋言吾祖自發跡
以來未嘗敗績與今日對照也苗者草之莖葉根
所生也裔者衣裾之末故以爲遠末子孫之稱朕
我也古者上下通稱之皇美也父死稱考伯庸三
閭父字攝提星名隨斗柄以指十二辰者貞正孟
始陳隅也正月爲陳蓋是月孟春昏時斗柄指寅
在東北隅故以爲名降下也此月庚寅之日巳始
下母體而生也皇皇考覽觀揆度也初度之度猶
言時節祭始錫賜嘉善正平則法靈神均亦平也
以正爲法以均爲神高平曰原乃名原字平之隱
文若王註法天法地類多不錄此凡例中所謂其
非者亦不下論是也後倣此言聖帝苗
裔賢父之子時日良名字嘉皆內美也

右一段敘世系祖考生時名字有木本水源顓名

思義之意言外見分當與國存亡也

紛吾既有此內美兮又重之以修能奈扈江離與辟芷兮紉秋蘭以爲佩汨余若將不及兮恐年歲之不吾與朝搴阰之木蘭兮夕搴洲之宿莽母日月忽其不淹兮春與秋其代序惟草木之零落兮恐美人之遲暮不撫壯而棄穢兮何不改乎此度蔡騏驥以馳騁兮馳來吾道夫先路昔三后之純粹兮固衆芳之所在雜申椒與菌桂兮君豈維紉夫蕙蒞米彼堯舜之耿介兮既遵道而得路何桀紂之昌被兮夫唯捷徑以窘步

紛盛貌。內美句。收上。修能句。起下。謂自修其才能。即扈紉。紉。搯。是也。重。再。這。被。辟。幽。也。離。芷。皆。香。草。級。以。綬。貫。鍼。秋。蘭。秋。時。蘭。愈。香。也。佩。飾。也。汨。水。流。去。疾。之。貌。搯。拔。取。也。阬。山。名。木。蘭。木。名。搯。采。也。水。中。可。居。者。曰。洲。木。蘭。去。皮。不。死。宿。莽。經。冬。不。枯。謂。貞。堅。也。言。余。之。汲。汲。自。修。常。若。不。及。者。恐。年。歲。不。待。我。而。一。身。將。老。故。朝。夕。自。修。之。勤。也。淹。久。代。更。序。次。也。草。曰。零。木。曰。落。總。上。離。芷。宿。莽。諸。物。也。美人。詩。彼。美。人。兮。西。方。之。人。兮。託。為。佳。名。寄。喻。於。君。也。後。靈。修。放。此。遲。晚。也。此。句。起。下。文。撫。者。撫。而。有。之。也。三。十。曰。壯。棄。去。也。草。荒。曰。穢。言。君。何。不。於。撫。有。壯。盛。之。時。早。棄。穢。政。改。前。此。惑。誤。之。度。果。能。乘。駿。馬。馳。騁。我。當。引。君。於。大。道。也。起。下。三。后。堯。舜。桀。紂。以。為。得。路。失。路。證。又。與。下。數。路。字。捷。徑。險。隘。踵。武。等。句。相。照。應。三。后。三。皇。下。文。堯。舜。遵。道。遵。三。皇。之。道。也。至。美。曰。純。齊。同。曰。粹。衆。芳。喻。羣。賢。雜。非。一。也。申。重。也。椒。生。重。累。而。叢。簇。故。曰。申。敷。苗。桂。葉。似。柿。椒。挂。味。辣。猶。難。然。用。之。不。獨。用。純。香。之。蕙。芷。而。

已喻能受逆耳之諫也。耿光介大，遵循昌被，亂捷
復邪道，窘促迫也。堯舜遵三后之道，故得路。桀紂
不遵故亡，窘步正與駝騁相反，得路則爲堯舜，捷
徑則桀紂是即矣。以上言楚王，以下方言黨人。
此節追言未疏時也。既恐歲不我與，汲汲自修，又
恐君亦遲暮，當及時任賢，已須先路引君上法堯
舜，下鑒桀紂，以興楚國也。

惟黨人之偷樂兮，路幽昧以陰隘。^其豈余身之憚殃兮，
恐皇輿之敗績。忽奔走以先後兮，及前王之踵武。^齊荃
不揆余之中情兮，反信讒而齎怒。余固知謇謇之爲
患兮，忍而不能舍也。指九天以爲正兮，夫惟靈修之

故也

曰黃昏以為期兮，羌中道而改路。

此二句與下悔遁有他意重，又王逸

無註，又通篇皆四句，此多二句，明係行文

初既與余成言兮，後悔遁而有他。余既不難夫離別

兮，傷靈修之數化。明此余既滋蘭之九畹兮，又樹蕙之百

畹。畦留夷與揭車兮，雜杜衡與芳芷。冀枝葉之峻茂

兮，願竢時乎吾將刈。雖萎絕其亦何傷兮，哀衆芳之

蕪穢。

黨人阿比相助，匪非之類，偷樂者，竊取淫佚之私，不顧君國之安危存亡者也。幽昧路，不光明，陰隘。

路不寬平、惟思念、殫畏、殃咎、皇君、與車、績功、敗績、指車之傾覆也、我之欲引君於光明、寬平之路者、豈殫一身之離殃哉、惟恐皇與行幽昧險隘之道、而傾覆耳、見君行邪徑、以至傾危、皆黨人偷樂之故也、詩大雅綿篇、予曰有先後、予曰有奔奏、奏與走同、言急欲奔走先後、以輔翼君也、前王楚之先王、及繼踵足跟、武迹、荃香草、借以密喻君、齊言怒氣之盛、如火、齊也、本欲引君至古、聖帝明王、今既不能、即法楚之先王、亦不至敗績、乃不察此中情、而反信讒、齎怒、何也、蹇、韻會通作蹇、晉書王豹傳、王臣蹇蹇、易蹇難也、險在前也、又王臣蹇蹇、匪躬之故、若止作直、諫解、三閭之放逐、豈止直諫之一端哉、為患指上、齎怒而言、忍甘受其患、而不辭之意、舍止也、余固知者、早已自知其如此、既結上、又為下、不吾知、作引、九天、天有九重也、正與證同、靈修謂君也、余固明知已之蹇蹇、必為身患、然中心忍而不能自止、故上指九天、證諸神明、明非為身謀、而為君也、成言謂已成之約言、悔改、遁移、有他

志也、近曰離、遠曰別、數化屢變易而無常也、言我
非難與、君離別、但傷君志、因讒言而數變易也、滋
樹畦雜、皆種植、蘭蕙留夷、揭車杜衡、芳芷皆香草
言種植者甚衆也、冀期望、峻茂長盛、俟待刈穫、萎
絕、草木枯死、蕪穢比廢棄也、言我初樹衆芳、望其
長盛、將爲國用、今我一人萎絕、亦何足惜、而衆芳
之蕪穢大
可哀也、

此節追述初見疏時也、忠心謀國、反遭讒害、明知
爲患、不能自止、成言變易、惟天可證、所樹衆芳已
付蕪穢、無窮虛願、皆成哀痛也、

衆皆競進以貪婪兮、憑不厭乎求索、素內恕已以量
人兮、各興心而嫉妒、忽馳騫以追逐兮、非余心之所

急老冉冉其將至今恐修名之不立朝飲木蘭之墜

露兮夕餐秋菊之落英苟余情其信姱以練要兮長

顒顒亦何傷擊木根以結蔭兮貫薜荔之落藥矯菌

桂以紉蘭兮索胡繩之纚纚謇吾法夫前修兮非世

俗之所服雖不周於今之人兮願依彭咸之遺則

衆指黨人也並逐曰競愛財曰貪愛食曰婪憑滿
不厭不以爲足恕已自恕其惡不責已也如俗言
饒恕之恕量度與生害賢爲嫉害色爲妬言黨人
心皆貪婪內以其志量度他人謂與已同則各生
嫉妬之心也馳騖亂走追逐急走馳騖申競進貪
婪三句非所急表已心不同於衆申恕已量人二
句冉冉漸也但恐衰老漸至美名不立衆所急在
彼我所急在此也英華飲露餐華所養皆香潔苟

誠信姱實好練要所修精練所守要約願領不飽
貌所困者身所飽者道言無損於道也擊持木蘭
根薜荔香草貫穿而累之藥花萼鬚粉藥藥然者
矯揉索以手搓爲繩胡繩亦香草有莖葉可作繩
纒纒素好貌擊木根也結蔭也貫薜荔也矯桂也
級蘭也索胡繩也言所佩芳潔不以困而改也承
上願領何傷言蹇難詞有用心竭力艱難辛苦之
意前修謂前代修德之人服習周合也彭咸殷賢
大夫諫其君不聽自投水而死遺餘則法也言
我勒苦效法前修雖不合於今而求合於古也
此節既疏後猶欲死諫也言我志立修名與衆不
同所養所服蹇法前修雖不合於貪婪求索之今
人而求合於以死諫君之古人也

長歎息以掩涕兮哀人生之多艱余雖好修姱以鞿

羈兮。謇朝諝而夕替。平林既替余以蕙纒兮，又申之以攬
茝。亦余心之所善兮，雖九死其猶未悔。怨靈修之浩
蕩兮，終不察夫人心。衆女嫉余之蛾眉兮，詆詆謂余
以善淫。固時俗之工巧兮，偃規矩而改錯。精背繩墨以
追曲兮，競周容以爲度。忼鬱邑余侘傺兮，吾獨窮困
乎此時也。寧溘死以流亡兮，余不忍爲此態也。詩驚鳥
之不羣兮，自前世而固然。何方圓之能周兮，夫孰異
道而相安。屈心而抑志兮，忍尤而攘詬。伏清白以死
直兮，固前聖之所厚。

艱汲塚周書音泥與溪叶替補韻叶才淫切而艱又音勤多一

轉音不如依三聲例替作平聲而艱叶泥為直捷耳

艱難也人三閤自謂言哀吾生多難也以下承此句言掩涕猶杖淚修姱謂修潔而美好鞿羈以馬自喻鞿在口曰鞿革絡頭曰羈言自繩束不放縱諄諄詩曰諄予不顧今詩作訊訊告替廢也以下方述見替事故太息流涕言之鑿鑿佩帶申重既以蕙纊見廢便應改悔又重以攢芷執志不回愈觸君怒矣然二物芬芳乃余心所善雖九死不悔况廢替乎靈修比君浩蕩水無涯人三閤自謂不曰已而曰人婉詞衆女比黨人蛾眉自比謠毀詠譖善淫工淫邪也偏向也明有規矩在前而方圓任其錯置背繩墨之正直以隨俗之邪曲務為周旋容悅以為競進之常德度字總承規矩繩墨而言洪曰傾規矩而改錯者反常而妄作背繩墨以追曲者枉道以從時怵憂悶鬱幽滯不通邑於邑短氣也佗僚失志貌言中心憂悶至於幽滯於邑者余之失志也窮困失志之實蓋奄也言我寧奄然

而死、不忍爲此邪淫之態、態指周容爲度而言、鵲
謂其悍厲搏執之惡也、周合也、方圓何能相周、異
道孰能相安、自古然也、屈不伸、抑校不發、心修姱
立名之心、志正君善俗之志、尤謂嫉妬、訥謂放逐
穰謂禍自外來、而順受之、如已所穰取也、伏清白
者、不肯臨危改節、以污此身、前聖猶前修、厚重
也、如武王封比干之墓、孔子稱殷有三仁、是也、
此節既廢之後、太息流涕、自述其志也、吾生多難、
既以忠廢、不能改悔、譖毀日甚、一身窮困、不忍隨
時、然忠佞不相謀、自古如斯、惟有一死爲前賢所
重而已、文至此已山窮水盡矣、下文另起一峰一
波也、

悔相道之不察兮，延佇乎吾將反。回朕車以復路兮，及行迷之未遠。步余馬於蘭皋兮，馳椒丘且焉止息。進不入以離尤兮，退將復修吾初服。製芰荷以爲衣兮，集芙蓉以爲裳。不吾知其亦已兮，苟余情其信芳。高余冠之岌岌兮，長余佩之陸離。芳與澤其雜糅兮，唯昭質其猶未虧。忽反顧以游目兮，將往觀乎四荒。佩繽紛其繁飾兮，芳菲菲其彌章。民生各有所樂兮，余獨好修以爲常。雖體解吾猶未變兮，豈余心之可

懲

陽庚通韻
後不詳

悔追恨前非、察明審、延佇少待、行迷所行、或誤、未
遠猶可回車也、追悔前日相道未審、迷行取困、今
將回車復路、及此惑誤未甚之時、意言歸隱也、步
徐行、澤曲曰皋、其中有蘭、故曰蘭皋、丘上有椒、故
曰椒丘、二句復路進出而仕、入合離、尤遭患、退復
路歸隱、初服隱者之服也、製剪裁、集補綴、芙蓉、荷
蓮、葉、芙蓉、蓮花、本草云、蓮其葉名荷、其花未發爲
菡萏、已發爲芙蓉、上曰衣、下曰裳、言被服益潔、修
善益明也、此與下文即所謂修吾初服、二句互文、
謂取芙蓉、荷芙蓉、以爲衣裳耳、不吾知者、進而仕、人
不知忠也、信芳者、退而隱、芙蓉、荷芙蓉、自信芳香也、
至此始出不吾知字、結上起下、乃一篇之脉絡也、
岌岌高貌、佩玉佩、陸離美好貌、芳謂氣之芳香、澤
謂色之潤澤、雜糅佩之盛、言盛其佩服、蓋欲明吾
本質之未虧耳、此八句文法參錯、本言製芙蓉、荷爲
衣、芙蓉爲裳、高冠長佩、芳澤雜糅、惟昭質猶未虧
苟余情其信芳、不吾知其亦已矣、然如此則文氣
傷直、故曲折出之、古文古詩皆然、惟楚詞爲獨多

忽疾速貌。反顧回首視。遊目縱目遠觀。四荒四方
即孔子浮海居夷之意。佩指衣裳冠佩而言。繽紛
盛貌。繁衆菲菲猶勃勃。芳香貌。彌章愈明。欲隱而
彌章。謂又不能隱也。好修好自修潔。未變不改其
好修之志。懲創艾。人生邪正清濁。各有所樂。而吾
獨好修爲常。天下重禍。無如支解。即使至此。吾猶
不變。則黨人之譏詠嫉妬。疏棄放逐。
豈能使余心懲而少改哉。言堅確也。
此節欲隱而不能也。前日相道未審。迷行離患。將
反初服。往觀四方。佩飾繽紛。欲隱彌章。好修爲常。
雖體解莫懲也。

女嬃之嬋媛兮。申申其詈予。曰鮌婞直以亡身兮。終
然歿乎羽之野。汝何博謯而好修兮。紛獨有此姱節。

資漿施以盈室兮、判獨離而不服、衆不可戶說兮、孰
云察余之中情、世並舉而好朋兮、夫何斃獨而不予
聽、

女嬃三閭姊也、嬋媛眷戀留連之意、申申猶重重
詈責數、曰、記女嬃之詞、鮌堯臣、帝紃曰、頤頤後五
世而生鮌、婞婞狠、蚤死曰殀、言鮌婞婞狠自用、乃殀死
中野、博謇謂廣博而忠直、紛盛貌、婞節、婞美之節、
資漿、藜漿、王芻、施泉耳、三物皆惡草、以比讒佞、盈
室、喻滿朝、判別、言衆人皆佩此惡草、汝何獨判然
不與衆同也、瑣、獨孤、衆既不可戶說、又孰能察已
之中情、況舉世朋黨、更無一同志者、瑣、獨至、此而
尚不聽余言、何也、補註、女嬃詈三閭之意、蓋欲其
爲審武之愚、而不欲其爲史魚之直耳、非責其不
爲上官靳尚、以狗懷王之意也、而說者謂其
詈三閭不與衆合、以承君意、誤矣、此解亦是、

此節述女嬃責數之詞。見內而不能見知於骨肉也。

右二段自紛吾既有此內美至此凡六小節共成一大段。自未䟽說到既䟽。自既䟽說到既廢。反復紛紜言已之上不見知於楚君。下不見知於盈朝。外不見知於黨人。內不見知於骨肉。一片孤忠無可告語。不得不折衷於前聖矣。

依前聖以節中兮。喟憑心而歷茲。濟沅湘以南征兮。就重華而陳詞。故九辯與九歌兮。夏康娛以自縱。不

顧難以圖後兮、五子用失乎家術、羿淫遊以佚政兮、
又好射夫封狐、固亂流其鮮終兮、浞又貪夫厥家、澆
身被服強圉兮、縱欲而不忍、日康娛而自忘兮、厥首
用夫顛隕、夏桀之常違兮、乃遂焉而逢殃、后辛之菹
醢兮、殷宗用之不长、湯禹儼而祇敬兮、周論道而莫
差、舉賢才而授能兮、循繩墨而不頗、皇天無私阿兮、
覽民德焉錯輔、夫維聖哲之茂行兮、苟得用此下土、
瞻前而顧後兮、相觀民之計極、夫孰非義而可用兮、
孰非善而可服、則余身而危死兮、覽余初其猶未悔、

不量鑿而正杓兮、固前修以菹醢、曾獻歎余鬱邑兮、
哀朕時之不當、攬茹蕙以掩涕兮、霑余襟之浪浪、

節中猶折中、喟歎、憑依歷、經歷、沅湘、皆水名、重華
舜號、帝繫曰、瞽叟生重華、是爲帝舜、葬於九疑山、
在沅湘之南、歎已依此芳潔之心、而歷茲舉國、莫
知之、時、故南征而折中於重華也、三閭之不得於
君、猶舜之不得於親、又楚之境內、故就之陳詞、不
然、古聖帝王多矣、何必舜哉、禹能辨九州物數、如
鑄九鼎是也、九歌、左傳、六府三事、謂之九功、九功
之德、皆可歌也、水火金木土穀、謂之六府、正德、利
用、厚生、謂之三事、故禹子九辯、九歌、禹樂、言禹平
治水土、以有天下、故能承先志、續敘其業、夏康、故
子太康、娛樂、縱放、圖謀、五子、太康昆弟五人也、家
爲宮中之道、太康以逸豫滅厥德、盤游無度、田於
洛南、十旬弗反、有窮后羿距之於河、而五子用此
亦失其家術、言國破而家亡也、事見尚書大禹謨

反五子之歌此爲楚王不思穆莊伯業耽樂是從
而言也罪有窮之君夏時諸侯封大泥寒泥罪相
婦謂之家言罪因夏衰亂代之爲政娛樂畋獵不
恤民事信任寒泥使爲國相罪改將踰泥使家臣
逢蒙射而殺之在罪之亂流固宜鮮終而寒泥貪
罪之家取爲已妻是以亂易亂身即滅亡也此爲
楚王盤於遊畋惑於鄭袖而言也澆寒泥子強圍
多力按字書安於不仁曰忍不忍者不改其不仁
也言泥取罪妻而生澆恃其勇力縱放其慾不改
其忍也康安自上而下曰顛隕墜也既滅殺夏后
相安居無憂日作淫樂忘其過惡卒爲相子少康
所誅此二事並見左傳襄公四年哀公五年此爲
楚王忿兵喪師不恤國事而言也常違違背常道
遂焉遂非而不改逢殃爲湯所放后辛即紂藏菜
曰菹肉醬曰醢紂殺比干醢梅伯武王誅之殷宗
遂絕不得長久也此爲楚王縱欲懷諫疏棄忠良
而言也按詩陳風有美一人碩大且儼傳矜莊貌
字書祇與祇同安也大也儼畏祇亦敬周周家差

過言殷湯夏禹周之文王受命之君皆畏天敬賢
講論道義無有過差又舉賢才遵法度而無偏頗
也繩墨堯舜相傳之法頗幽昧險隘之路也竊愛
爲私所私爲阿錯與措同置也輔佐民德有德於
民哲智茂盛苟誠下土謂天下也天本無私唯寬
有德於民之聖君如禹湯文武者則篤生哲人如
伊呂周召以爲輔佐夫維有如此之聖哲輔佐方
能用此下土也此爲楚王不能循先聖之繩墨而
言也以上所陳興國之大法也瞻臨視顧還視相
觀興亡相參而觀計算極皇極按書曰皇建其有
極疏入君爲民之主大自立其有中之道也用任
服行言前瞻湯武之所以興後顧桀紂之所以亡
二者相參而觀計其自古以來爲民之主者孰有
非義之人而可任孰有非善之事而可行者乎反
筆結上文興亡二意也以上皆爲重華陳昔日諫
君之詞如此臨近邊而欲墮也余初余昔日諫君
之詞即上所陳者是也危死言幾死杓鑿方圓之
不相入猶忠佞邪正之不相合不量其不合而強

入之前修固有以此菹醢若龍逢梅伯者言我初
諫時固知如此故今日不以爲悔也曾謂同累也
歔歔哀泣之聲鬱邑憂哀時不當自哀生不當舉
賢之時而值菹醢之世以茹蕙二香草拭淚霑濡
也衣背謂之襟浪浪流貌

此節皆求折中之詞也我平昔以古之興亡諫君
固知得禍今果然矣言外重華以我爲是耶非耶
跪敷衽以陳辭兮耿吾既得此中正平聲馳玉虬以乘鸞
兮溘埃風余上征朝發軔於蒼梧兮夕余至乎縣圃
欲少留此靈瑣兮日忽忽其將暮吾令羲和弭節兮
望崦嵫而勿迫路曼曼其修遠兮吾將上下而求索

敷布衽裳際耿明也有角曰龍無角曰虬鷖鳳類
身有五采流奄忽埃塵征行此言肅整衣冠跪而
陳詞敬之至也重華以我所陳之詞爲是吾耿然
自覺得此中正之道矣遂乘龍跨鳳遺風塵而上
征也輒楷車木將行則發之蒼梧舜所葬縣圃在
崑崙之上靈瑣神靈之門謂舜廟也言朝發蒼梧
非不欲少留重華之門但期夕至懸圃時光有限
我心孔棘也羲和堯時主四時之官賓日侵日者
也弭按止也按節徐步崦嵫日所入之山迫急曼
曼遠貌修長路阻且長非可速至故令日御勿急
迫求索者求索
神靈折中也

此節言重華既許其是自信得中正矣何必上下
求索又折中神明哉意蓋謂重華不許則從此已
矣既得中正矣乃廣求折中欲使君悟俗改楚國

復與非徒托之空言，拚一死以塞宗臣之責而已。
也。下文見帝是折中於天，求女是折中於神，妃靈
氛是折中於卜筮巫咸，是折中於鬼神也。此八句
爲下一大段領袖，若作求君解，不惟無明文可證，
而三閭豈事二君者哉？

飲余馬於咸池兮，搃余轡乎扶桑。折若木以拂日兮，
聊逍遙以相羊。前望舒使先驅兮，後飛廉使奔屬。鸞
皇爲余先戒兮，雷師告余以未具。吾令鳳鳥飛騰兮，
繼之以日夜。飄風屯其相離兮，帥雲霓而來御。紛總

總其離合兮。斑陸離其上下。吾令帝閭開闔兮。倚閭闔而望予。時曖曖其將罷兮。結幽蘭而延佇。世溷濁而不分兮。好蔽美而嫉妬。

淮南子曰。日出湯谷。沐於咸池。拂於扶桑。總轡六轡在手也。十洲記。扶桑在碧海中。葉似桑。長數千丈。大二千圍。兩兩同根。更相依倚。是名扶桑。若木。日入處。在崑崙西。日夕無光。拂拭之。使明也。道遙相羊。從容自適。凌晨起行。日夕始停。車自適也。此言盡日而行也。望舒。月御。飛廉。風伯。屬連鸞。鳳之佐皇。雌鳳。雷師。雷神。具備。將具而尚未具。非不備也。戒諭。本欲。連夜疾行。雷師更疾于飛廉。今使鸞皇諭使。速儀。而雷師告以未具。言今夕猶不能盡夜而行也。鳳。靈鳥。飛騰疾速之甚。離麗。飄風。回風。也。聚霓。虹屬。郭璞云。雄曰虹。謂明盛者。雌曰蜺。謂暗微者。御。迎也。急欲上行。故令鳳鳥飛騰。不待雷。

師之具而日夜疾驅輕風屯聚雲霓隨風而來迅
入門將近矣紛紜總總衆多斑五彩離合不定陸
離光怪倚者闔者倨傲之狀望余者目視而身不
少動帝天帝闔主司門之隸閭闔天門身到天門
五色雲氣離合上下紛紜衆多見帝情切刻不容
緩令司闔開闔急入而闔者乃一望而見拒也暖
暖日暮罷力疲日已暮矣結蘭久立因歎塵世蔽
美嫉妬清濁不分今司闔見拒我之中情將終不
能見帝自陳耶言外有天門之下亦復如是之意

此節欲就天帝陳詞折中以夜繼日疾行而至闔
者見拒乃歎息而他適也

朝吾將濟於白水兮登閭風而縹馬忽反顧以流涕
兮哀高邱之無女嗟吾遊此春宮兮折瓊枝以繼佩

及榮華之未落兮，相下女之可詒。態吾令豐隆乘雲兮，
求處妃之所在。解佩纓以結言兮，吾令蹇修以為理。理
紛總總其離合兮，忽緯繡其難遷。夕歸次於窮石兮，
朝濯髮於洧盤。保厥美以驕傲兮，日康娛以淫遊。雖
信美而無禮兮，來違棄而改求。覽相觀於四極兮，周
流乎天。余乃下望瑤臺之偃蹇兮，見有娥之佚女。吾
令鳩為媒兮，鳩告余以不好。雄鳩之鳴逝兮，余猶惡
其佻巧。心猶豫而狐疑兮，欲自適而不可。鳳皇既受
詒兮，恐高辛之先我。欲遠集而無所止兮，聊浮遊以

逍遙及少康之未家。今留有虞之二姚。理弱而媒拙。今恐導言之不固。世溷濁而嫉賢。今好蔽美而稱惡。

淮南子言白水出崑崙之山。閭風山上。縹緲高邱。楚地名。楚國盡為朋黨。丈夫中無可語者。女中或有亦未可知。自去天門。將濟水登山。繫馬少息。忽而回顧。不覺流涕哀楚。國並女亦無有也。故下欲遊春宮。求處妃。見佚女。留二姚也。濫奄春宮。東方青帝舍瓊枝。玉樹枝。續榮華。未落喻時尚可為也。落墮相視。下女侍女。詒遺也。游春宮折瓊枝。而續玉佩。以遺下女。正欲及榮華之未落。使通陳詞。折中之意。於神妃也。豐隆雲師。處妃。王逸曰。神女也。洛神賦注。伏羲氏女。溺洛水而死。遂為洛神。鑲佩帶。蹇修媒通詞理。下文佚女為高辛妃。二姚為少康妃。若以此意例之。則處妃當是伏羲之妃。非女也。紛總總句。言議論紛紜。忽離忽合。猶未定也。緯繆乖戾。遷移次舍。窮石山名。在張掖。即后羿之

國也。消盤水名。言其始也。猶在離合不定間。而終則乖戾。必不可移。乃夕歸朝沐。將改求也。下四句方言不合之故。倒敘楚詞中多用此法。倨簡曰。驕侮慢曰傲。康娛安樂。違去言。虛妃驕傲。康娛雖美。而無禮。故棄去而改求。不可以陳詞折中也。按字書。覽觀也。相選擇之意。觀諦視。周流遍遊。四極四方。盡處遍遊。上天下地。正改求也。所謂上下求索也。瑶玉之美者。偃蹇高貌。有娥國名。佚美。謂帝嚳之妃。契母簡狄。事見商頌。呂氏春秋曰。有娥氏有美女。爲之高臺。以飲食之。鵲惡鳥名。羽有毒。可殺人。告子簡狄。以不好者。詐言反間我。也。雄鵲鵲。挑輕巧利。又使雄鵲飛鳴而往。然其性輕挑。巧利。不可信也。猶犬子。人將犬行。犬好豫在人前。待人不得。又來迎候。故謂事不決曰猶豫。狐多疑。而善聽。河水始合。狐聽其下。不聞水聲。乃敢過。故人過河。冰者要須狐行。然後敢度。因謂心多疑者爲狐。疑高辛帝。嚳有天下之號。鵲鵲皆不可使。故心中疑惑。意欲自往。禮有不可。彼高辛已貽鳳皇而往。

故恐其先我矣。又不得陳詞而折中也。遠集遠去，惜誦篇欲高飛而遠集是也。少康夏后相之子，有虞國名姚姁，舜後，以二女妻少康，事見左傳。欲遠集改求，又無處所，聊且浮游逍遙，願及少康未妻於有虞之時，留二姚也。意言懷王已不可望，猶望項襄能如少康之興復也。理即塞修以爲理之理，弱劣拙鈍，理弱媒拙，言不堅固，恐無以留二姚也。因歎世之溷濁，嫉賢所好如此，則二姚必不能留矣。

此節欲求女折中，忽而反顧流涕興哀，乃上下求索，諸處無成，欲及少康未室爲留二姚，有嗣君中興之望，而又不能溷濁一歎末如何矣。古賢女甚多，篇中專引妃后者，是對照鄭袖而言也。求女數

節文法變換一則求之而無有一則始合而終離
此高邱必妃之別也一則先求後見覲面千里一
則先見後求又後高辛此處妃有娥之別也至欲
留二姚理弱媒拙言恐不堅又一變也

閨中既以遠遠今哲王又不寤懷朕情而不發兮余
焉能忍而與此終古

爾雅宮中小門謂之閨又字書女稱閨秀所居亦
曰閨遠深哲知寤覺終古者古之所終謂來日之
無窮也閨中指鄭袖言哲王指懷王猶云天王明
聖也黨人懷王可明言鄭袖不可明言故以閨中
渾言之上文已有九死體解等句則
焉能忍而與此終古是言欲死也

右三段折中重華既得中正因上叩天閭拒於閭者溷濁嫉妬丈夫中莫能我知復求之女中又不可得乃歎息閨中深遠既不能陳辭哲王又不能覺寤我之情懷終不能發之於世安能隱忍而與溷濁嫉妬者共此無窮之日月乎計惟有一死而已此四句畫龍點睛也前美人靈修蓀荃皆暗指楚王至此明點出哲王又帶出閨中不惟結第三段乃前半篇之總結又後半篇之總起一篇之樞機所謂文之心也以閨中謂指上諸妃后可也

若以哲王謂指天帝不可也。自古未有以王稱天
帝者。卽三皇五帝亦未有以主稱者。況天帝乎。既
是指楚王。則閨中指古妃后。愈不可也。非指鄭袖
而何。玩既字又字。本文十分明白。若謂哲王深居
閨中。文理不順之甚。其指鄭袖也無疑。若以求女
作求君解。下文豈惟是其有女是字。指楚國而言。
楚國之君豈可任三閭之意而求乎。況求君自巫
咸文中始言之。而又無求女字。三閭文中從未有
求君意。求女非求君。斷斷如也。若作求賢求隱士

解更荒唐無據、篇中如以江籬秋蘭比才德、則先以修能句點明、如以衆芳句比賢臣、則先以三后純粹句點明、如以衆女比黨人、則先以靈修不察句點明、何所據而作求賢求隱士解乎、即下文豈惟是其有女、聊浮游而求女、上下亦無明文玩前有不吾知其亦已矣句、後有莫我知兮句、二知字、是言楚國溷濁嫉妬、丈夫中無知我者、聊於女中求之、即世有一人知己死可無恨之意、不過甚言楚國丈夫皆黨人耳、今求女下、即緊接閨中字、是

借女字暗點鄭袖也。或問三閭非交通宮掖者而言鄭袖何也。袖能惑懷王。釋張儀。聰明有過人者。古賢妃諫君以道者不乏。此三閭於心盡氣絕。無可奈何時。姑作期望之想耳。非真有是事也。古來文章多搥鼓邊。然鼓心一兩下。定不可少。此正鼓心一兩下也。若無此句。則通篇皆在半明半暗間。全無眼目矣。後之君子必有知者。

索荈茅以筵簞兮。命靈氛爲余占之。曰兩美其必合兮。孰信修而慕之。思九州之博大兮。豈惟是其有女。

曰勉遠逝而無狐疑兮、孰求美而釋女、何所獨無芳
草兮、爾何懷乎故宇、世幽昧以眩曜兮、孰云察余之
善惡、民好惡其不同兮、惟此黨人其獨異、戶服艾以
盈要兮、謂幽蘭其不可佩、覽察草木其猶未得兮、豈
理美之能當、蘇糞壤以充幃兮、謂申椒其不芳、

索取、葇香、蕝、茅、白茅也、二草皆芳潔、可藉筵、纂折
竹、以卜也、靈氛、明占吉凶者、曰、占詞、兩美者、男女
俱美貌、喻同德同志、言世有兩美、終當必合、然楚
國孰有能信汝之修潔而慕之者乎、言楚無同德
同志、思九州之廣大、丈夫中必有知汝者、豈惟楚
之有女乎、以上占詞也、曰者、靈氛之言也、言由占
詞觀之、九州博大、宜勉力遠去、無用狐疑、兩美必
合、孰有求美而舍汝者乎、何所獨無芳草、天下同

類衆多何必只懷楚國靈氛之言止此以下皆三閭之言幽昧謂昏暗於內眩曜謂偽飾於外楚人如此舉世可知孰能察余之善惡乎雖往而亦無所合也人性好惡固有不同惟此黨人更爲獨異艾臭草甚且戶皆服艾服且滿腰而反以蘭爲臭惡而不可佩瑤美玉色相玉書云瑤大六寸其耀自照言草木易察之物尚不能察若察瑤玉之美豈能得當乎蘇取也史記樵蘇以爨謂取草也悖謂之勝即香囊既蘇糞壤而充幃則謂中叔不芳也宜矣起二句箴占自忖

此節靈氛之占言當遠逝三閭念舉世幽昧去既不可黨人獨異住又不可總寫孤疑以起下巫咸之文也

欲從靈氛之吉占兮心猶豫而狐疑巫咸將夕降兮

懷椒糈而要之、百神翳其備降兮、九疑繽其並迎、皇
剡剡其揚靈兮、告余以吉故、曰勉陞降以上下兮、求
榘蕝之所同、湯禹儼而求合兮、摯咎繇而能調、苟中
情其好修兮、又何必用夫行媒、說操築於傅巖兮、武
丁用而不疑、呂望之鼓刀兮、遭周文而得舉、甯戚之
謳歌兮、齊桓聞以該輔、及年歲之未晏兮、時亦猶其
未央、恐鶉鴂之先鳴兮、使夫百草爲之不芳、何瓊佩
之偃蹇兮、衆夢然而蔽之、惟此黨人之不諒兮、恐嫉
妬而折之、

欲從兩美必合之吉占而遠逝心尚未決也巫咸
神巫降下神椒香物糝精米要約二句結上二句
起下翳蔽備降齊降續盛貌九疑在零陵蒼梧之
間疑似山有九峯其形相似遊者疑焉故曰九疑
百神蔽日來下九疑之神紛然來迎也皇大剡剡
光輝揚靈顯應三句敘神降之盛告吉故求神之
詞也曰記巫咸語陞降上下謂周遊列國跋涉山
水之勞也渠嬖所同言同德也儼敬調和摯伊尹
名咎繇舜士師言陞降上下求同德之賢君昔湯
之得伊尹禹之得咎繇渠嬖既同始能調和而必
合也行媒喻左右之先容言誠心好修賢君自當
舉而用之不必須左右薦達也說傳說傳巖地名
武丁殷高宗言傳說操築作於傳巖武丁舉而用
之不以無媒而見疑事見尚書說命篇呂望太公
姓姜氏從其封姓故曰呂鼓鳴太公避紂居東海
之濱聞文王作往歸之至於朝歌道窮困因自鼓
刀而屠遂西釣于渭濱文王夢得聖人於是出獵
而遇之遂載以歸用以爲師言吾先公望子久矣

因號爲太公望、該備、寧戚、衛人、修德、不用、退而商
賈、宿齊東門外、威公夜出、寧戚方飯牛、叩角而商
歌曰、南山粲、白石爛、生不逢堯與舜、短布單衣
適至飢、從昏飯牛、薄夜半長夜漫漫、何時旦、威公
聞之曰、異哉、歌者非常人也、命後車載之、用爲客
卿、備輔佐也、言桀、殤所同、自然必合、苟能自修、不
用行媒、歷舉古人以實之也、晏晚、央、盡、鶉、鴉、鳥名、
即詩所謂七月鳴鴉者、鳴則百草歇、先鳴者不待
當鳴之時而早鳴也、勉使及此、身猶未老、尚足有
爲、時猶未過、不可輕失、遲則惟恐鶉鴉先鳴、使百
草不芳也、餒、寒、困、頓、失志貌、蓼、然者、蔽之極、不諒
不可測、折、摧、敗也、汝今困頓失志、衆猶蔽之如此
此輩不可測度、恐必致汝於死也、巫咸擇君之言
進靈氛遠逝、一層以上皆巫咸之言、若作三閭自
念之詞、則前已有九死不悔、體解未變等句、豈三
閭至此而又懼摧折乎、自相矛盾、豈有此理、況下
文三閭文中亦止言不可淹留、時俗變化、摧折
之意、一字不及、則此爲巫咸勸駕之言無疑、

此節先以君臣同德不用行媒喻之。又歷引古人以實之中以年歲促之。終以死決之言。當遠逝而擇君也。擇君始於巫咸。前後皆未有也。

時續紛以變易兮。又何可以淹留。蘭芷變而不芳兮。荃蕙化而爲茅。由何昔日之芳草兮。今直爲此蕭艾也。豈其有他故兮。莫好修之害也。余以蘭爲可恃兮。羌無實而容長。委厥美以從俗兮。苟得列乎衆芳。椒專佞以慢慝兮。椒又欲克夫佩褱。既下進而務入兮。又何芳之能祇。平固時俗之流從兮。又孰能無變化。利覽椒

蘭其若茲兮，又况揭車與江離。

續紛亂變易更改不可淹留宜速去也茅惡草巫
咸言當遠去擇君三閭不答擇君止言風俗人心
紛紛更變如蘭芷變而不芳荃蕙變而為茅蕭艾
賤草然何所為而昔日之芳草如蘭芷荃蕙者今
直變而為蕭艾此豈有他故哉莫非觀我之好修
而賢害遂至此也化茅不過不香而已蕭艾則臭
矣不芳為茅二句言變易之盛直為蕭艾二句變
易之甚豈有他故二句變易之由也可恃者信其
不變之謂無實容長者謂無蘭之實徒有蘭之貌
委棄從俗趨時也言芳芷之類猶是尋常之芳草
若蘭者國香也今乃無實容長棄其國香之美變
而從俗不過苟列眾芳之虛名而已專一伎諂諛
慢傲情愆淫書曰無即陷淫椒茅莫憚盛香之囊
也蓋以椒之芳烈變為邪佞茅莫毒臭欲克香囊
蘭既隨之干進而務入又何能復敬守其國香之
節乎時俗盡從下流孰能砥柱不變哉以蘭之國

香椒之芳烈猶且若茲况
揭卑江離尋常芳草乎

此節答巫咸之詞君子變為小人何況中材反復
言其變易之盛見不可淹留也

惟茲佩之可貴兮委厥美而歷茲芳菲菲而難虧兮
芬至今猶未沫師和調度以自娛兮聊浮游而求女及
余飾之方壯兮周流觀乎上下戶

虧損滅沫已言瓊佩以可貴之質雖為他人委棄
以至今日而芬芳之氣猶難虧而未已也和調猶
調和度襟度言我調和襟度以自娛遂浮游求女
如前所言處妃佚女二姚之屬言丈夫中終無可
語又於女中求之得一人知已死可無恨之意也
余飾謂瓊佩及前章冠服之盛方壯亦巫咸所謂

年未晏時未央之意周流上下即靈氛所謂遠逝
巫咸所謂陞降上下也言將去楚而曠觀天下也
此節言茲佩爲他人委棄以至今日困頓已極在
我者不失良貴且調和吾之襟度聊浮游求女庶
得知已及此年歲未晏從其吉而遠逝也

靈氛既告余以吉占兮歷吉日乎吾將行折瓊枝以
爲羞兮精瓊靡以爲粦爲余駕飛龍兮雜瑤象以爲
車何離心之可同兮吾將遠逝以自疏遭吾道夫崑
崙兮路修遠以週流揚雲霓之晻藹兮鳴玉鸞之啾
啾朝發軔於天津兮夕余至乎西極鳳凰翼其承旂

今高翔翔之翼翼忽吾行此流沙兮遵赤水而容與
麾蛟龍以梁津兮詔西皇使涉予路修遠以多艱兮
騰衆車使徑待路不周以左轉兮指西海以爲期屯
余車其千乘兮齊玉軼而並馳駕八龍之蜿蜿兮載
雲旗之委蛇抑志而弭節兮神高馳之邈邈奏九歌
而舞韶兮聊假日以媮樂陟陞皇之赫戲兮忽臨睨
夫舊鄉僕夫悲余馬懷兮蜷局顧而不行

歷選精細糗糧不從巫咸求君之吉占而從靈氛
遠逝之吉占也瓊枝玉樹枝羞膳周禮天官膳夫
掌王之食飲膳羞麋屑折玉枝爲羞精玉屑爲糧
選吉將行先具行資言飲食皆玉不獨佩而已造

次必於是、顛沛必於是也。駕飛龍去之速、雜瑤華、美其車、離心、謂君心已離、不能復合、遠逝自疏、不得已也。以下止言遠逝、不言求君、安得以求女、作求君解哉。邇、轉、後、漢、書、注、云、崑崙、在、肅、州、酒、泉、縣、西、南、崑崙、之、路、修、遠、周、流、而、後、到、雲、霓、於、旗、掩、藹、飛、揚、蔽、日、玉、鸞、鈴、之、著、於、銜、者、啾、啾、鳴、聲、車、行、而、鈴、鳴、也。天、津、謂、銀、漢、借、喻、楚、之、漢、水、爾、雅、幽、為、西、極、朝、發、夕、至、行、之、速、鳳、翼、鳳、羽、小、雅、四、牡、翼、翼、傳、開、也。又、四、騏、翼、翼、傳、壯、健、也。一、上、一、下、曰、翔、直、刺、不、動、曰、翔、鳳、翼、承、旗、而、翔、翔、甚、開、言、行、雖、甚、速、而、不、忙、迫、也。流、沙、流、如、水、見、禹、貢、今、西、海、居、延、澤、是、也。導、循、赤、水、出、崑崙、東、南、陬、入、南、海、容、與、從、容、以、手、教、曰、麾、忽、行、至、流、沙、為、赤、水、所、阻、乃、白、精、之、君、故、曰、西、皇、帝、少、皞、以、金、德、王、從、容、計、算、詔、西、皇、使、麾、蛟、龍、為、橋、以、渡、我、猶、言、此、鼉、鼉、以、為、梁、也。不、周、山、名、山、海、經、西、北、海、之、外、有、山、而、不、合、名、曰、不、周、指、語、期、會、言、此、路、多、艱、使、衆、車、飛、騰、而、先、過、直、待、我、於、赤、水、之、西、我、當、自、不、周、

山而左行以至西海爲期也。王狀玉轄委蛇飄揚。千乘衆多並馳同發屯聚。蜿蜿龍貌雲旗以雲爲旗。西皇來涉故車騎愈盛也。抑按志西海爲期之志。弭止節所執之旗以指麾行止者言日暮止宿也。邈邈遠貌身雖止宿神猶邈邈高馳必至西海奏禹之九歌舞舜之九韶。假日媮樂乃遂今夕之志也。勝從下而上陞初出皇皇天赫戲日光赫赫然光明睨遠視舊鄉楚國僕御懷思也。蜷局詰曲不行貌僕夫愚蠢余馬無知俱戀故鄉而况人乎。

此節從靈氛之吉占遠逝自疏象車龍駕鳳凰承旗蛟龍梁津一則曰道崑崙一則曰至西極一則曰詔西皇終之以西海爲期而爲太平之樂舞日暮止宿忽而天曉顧見故鄉御馬猶知戀土余獨

何人能遠去乎、然上下周流、而不言三方者、不惟懷王在秦、言外蓋欲遂滅秦復讐之志也、

右四段、閨中邃遠、哲王不寤、決之靈氛巫咸、多不入耳之言、屈俗變易、君子化爲小人、惟余良貴、雖爲人棄、一毫未損、不從其求、君之占、從其遠逝、自疏而已、龍車鳳旗、西皇可詔、西海可期、虞夏之樂、可奏、志願可遂、而終不忍去故鄉也、

亂曰、已矣哉、國無人兮、莫我知兮、又何懷乎故都、既莫足與爲美政兮、吾將從彭咸之所居、

亂者樂節之名國語云其輯之亂輯成也凡作篇章既成撮其大要以爲衆辭也史記曰闕雅之亂以爲風始禮曰既奏以文又亂以武已矣絕望之詞無人謂無賢人故都楚國也右五段已矣哉莫我知矣又何懷乎故鄉不死而虛生乎爲美政者知之實也既莫足與爲美政吾將從彭咸而死庶不負命名字之義而可見祖考於地下也通篇五段以祖考命名爲綱領以知字爲鍼綫以從彭咸而死爲主意篇中余固知後止兩知字前不吾知其亦已矣後莫我知兮而君之放逐黨人

之嫉妬、女嬃之詈折中重華、叩帝閭上下求女、占靈氛、問巫咸、遠逝自疏、莫與爲美政、皆莫我知也、願依彭咸之遺則、下云、雖九死猶未悔、又云、寧溘死以流亡、又云、伏清白以死直、又云、雖體解吾猶未變、又云、阼余身而危死、又云、焉能忍而與此終古、結云、從彭咸之所居、主意如此、究之所以死者、皆莫我知也、近有謂王叔師彭咸投水爲無據者、漢時書籍、今失傳者甚多、又安知王之無所據乎、後懷沙惜往日、悲回風諸篇、言沈淵甚明、又漢之

賈誼東方朔莊忌王褒劉向太史公言汨羅無異
詞、諸人去古未遠、豈盡虛謬、然則彭咸之投水即
無據、而三閭之汨羅則有據、守死善道、日月爭光、
要無愧高陽之苗裔、皇考之名字而已矣、仁至義
盡、至中至正、而後之論者、猶以爲過、孔子曰、殷有
三仁焉、吾竊痛三閭不生、獲麟之前也、
此篇五段、首段古帝起、末段時王結、煌煌大篇、起
結緊嚴、二段三后堯舜用於前、三段羿浞湯禹有
娥高辛用於前後、四段伊尹皋繇用於中、他如倒

字倒句、倒數句、神龍變化、不可端倪、向者予不知
用古之法、多不解、不知倒敘法、愈不能解也。